



15. februar 2019

UPA 2019/52

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Landskarsimit tapiiffigineqartartussamik nammineq piumassuseq tunngavigalugu suliffissaaleqilernissamut sillimmasiisarfirmik pilersitsisinnaanermut atatillugu inuiaqatigiinnut sulisartunullu aningaasatigut iluaqutissartai akorngutaalu pillugit misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi ilanngunneqassapput periuseq ataatsikkut sullivinnut tamanut atuuttoq kiisalu periuseq sullivinnut assigiinngitsunik suliaqartunut ataasiakkaanut atuuttusaaq ilaatillugu kattuffiit pineqartumut isumaat. Misissuinerup inerneru Inatsisartunut ilaasortanut agguanneqassaaq kingusinnerpaamik UKA2020-mi. (Inatsisartunut ilaasortaq Steen Lyngge, Demokraatit)

Tunngavilersuut

Sullivimmi aalajangersimasumik atorfeqartitaagaluarluni angerlartitaasarneq sulisartorpassuit misiginikuuat, sullivup matusariaqarnera pissutigalugu. Suliffiup suliaaleqinera pissutigalugu omaluunniit tunisassiassanik amingaateqarnera imaluunniit suliffiup akiliisinnaajunnaarnera pissutigalugu.

Sulisartut taamaasillutik ullormiit ullormut pisuussutiginngisaminnik isertitassaraluatik annaasarpaat allatullu ajornartumik pisortat isumalluutigilersarlugit, naak tamanna namminneq kissaatiginnikkaluarlugu. Akissarsiorunnaarluni pisortat ikiorsiissutaannik pisartagaqalerneq mikinnigsumik isertitat appariarnerannik kinguneqartarpoq.

Inuiaqatigiit innuttani tunniusimallutik aalajaallutillu sulilluartut tamaasa isumagissappagit taava suliffissaaleqilersinnaanermut aningaasaateqarfittaarsinnaanissaq sulisartunut orniginarsinnaanersoq misissortariaqarparput. Periuseq taamaattoq ulluinnarni taaneqartarpoq "A-karsi".

A-karsi nammineq piumassuseq tunngavigalugu aaqqiineruvoq inuit ataasiakkaat nammineq qinertagaat ilaasortaaffiginiarnerlugu ilaasortaaffigissanngininnerluguluunniit. A-kassemi ilaasortaanerup iluaqutissartaraa suliffissaarussimagaanni ingerlaannaq pisortat ikiorsiissutaannik pisartagaqartariaqalinnginnissaq. Taarsiullugu A-karsimit ullormusiaqarneq atuutilissaaq. A-karsip inuiaqatigiit sipaartittarpai A-karsip ingerlannera ullormusiaqartitsisarneralu ilaasortanit aningaasalersorneqarmata. Nunanili amerlasuuni suliffissaaleqilernissamut sillimmasiisarfiit assersuutigalugu ingerlanneqarnerata aningaasalersorneqarneranut naalagaaffik ikorfartuisarpoq aamma inatsisartut aalajangersartarpaat ilaasortaasut qanoq aningaasanik pisartaqartassanersut.



Siunnersuuteqartutut isumaqarpunga Kalaallit Nunaanni nammineq piomassuseq tunngavigalugu ilaasortaaffigineqarsinnaasumik suliffissaaleqilernissamut sillimmasiisarfimmik pilersitsissagaluarutta taava aaqqiissutigineqarsinnaavoq suliaqarfinnut assigiinngitsunut agguluineq imaluunniit sulisartunut ataatsimoortumik sullimmasiisarfiliornissaq. Naliginnaasumik suliaqarfinnut agguluineq atorneqartarpoq, ikittunnguugattali immaqa periuseq ataatsimoorussa atoraanni iluaqutissarsivigineqarsinnaanerussajunnarsivoq. Ataatsimoorussamik sillimmasiisarfiliussagutta assigiinngitsumik akiliuteqartarnissaq, assigiinngitsunik pisartagaqarnissaq il.il. eqqarsaatigineqarsinnaapput. Suliaqarfinnuli agguluisoqassappat misissorneqarsinnaavoq ataatsimoorussamik allaffeqarnek arlaatigut iluaqutissarsivigineqarsinnaanersoq.

Suliffissaaleqilersinnaanermut sillimmasiisarfiit kattuffiit iluanni inuinnarnit aallartinneqakkajupput. Kalaallit Nunaanni sillimmasiisarfik iluatsissappat aamma pingaaruteqarpoq qularnaassallugu sulisartut ilassinnilluarnissaat aamma taakku ilisimasaasa isumaasalu ilanngunneqarnissaat. Kattuffiit aamma misissuinerup aallaqqaataaniit naggataanut suleqataatinneqartariaqarput taamaattumik qitiulluinnarpoq tusarniaavigineqaannannginnissaat.

Taamatut oqaaseqarlunga neriuppunga partiit isumaqatigissagaannga ilumut isumassarsiatsialaassasoq tamatuma qulequttap pingaarutillip nassuiaammi itisilerneqarnissaa.

Aningaasarsiornikkut allaffissornikkullu pisortanut

Nalilerneqarpoq nassuiaasiornermut atatillugu ilinniagartuup ukioq ataaseq atortariaqassagaa, tassa 500.000 koruunit missaani.

Aningaasarsiornikkut allaffissornikkullu namminersorlutik inuutissarsiutunut kingunissai.

Soqassanngilaq nalunaarusiap suliarineqarnerani.

Aningaasatigut allaffissornikkullu innuttaasunut kingunissai.

Soqassanngilaq nalunaarusiap suliarineqarnerani.